

羣經質卷之下

濟鄆縣陳 僅餘山撰

周禮

周禮

周禮一書雖未必出自周公要是周室故府舊章觀其體大思精七十子而後必無此力量然中間多所竄亂善學者祇當虛心衡擇以衷諸一是乃疑周官者并廢其真信周官者曲護其僞而此書遂成聚訟矣

鄭司農

賈公彥周禮正義序引鄭玄序云世祖以來通人達士
大中大夫鄭少贛名興及大司農仲師名眾云云二鄭
同宗之大儒又太宰正義云二鄭皆康成之先故言官
不言名字其說明甚楊升庵徑以康成爲司農之子以
同歆並舉誤矣

幣餘之賦

幣餘國用所餘諸司所返納非歲入也而亦謂之賦聖
人之以天下爲公示萬世以節儉之道也隋唐以降乃
以羨餘充內藏其進羨餘者無非例外之誅求甚至今

歲羨餘明歲遂定爲成例羨餘不足數罪且浮於正額
猶以周官自文何哉

小宰

小宰六敘末曰以敘聽其情六屬末曰小事則專達先
王之世所以下隱胥通羣材畢效而無君門萬里之無
者此也

小宰注書契謂出予受入之凡要案凡物之在其中者
出而後予於人在外者受而後入於內古人注經卽一
字之序不妄下如此

膳夫

六穀六牲六清以及羞養皆有定品非是則不以共喪
荒災札有損無加不言會而會在其中矣不然蒲桃入
而漢衰荔枝貢而唐亂雖會何益

甸師

小宰掌宮刑故宗室之刑掌於甸師亦屬於天官親之
也其必於甸師何耕耨王藉蠶盛之所出惟祖宗實式
臨焉亦親之也

場官

瘍醫祝藥之祝應讀如字祝由主於治瘍素問所謂可以祝詛而愈也禮記郊特牲有由辟焉由以祝病辟以禳災鄭注謂弭苗兵遠罪疾也是已其曰由用也則非辟辟除也亦不必改讀爲弭祝由科列於周公十三科之末神農以前卽有之而黃帝傳之周公著諸經今乃以爲異端邪教而禁之將坐視其民之疾痛死亡而反治拯救者以罪也可乎

司書

夫家六畜之數登於鄉大夫而周知於司書此文王五

母雞二母雛之制可以互證者周公豈欺我哉

大司徒荒政

荒政十二曰多昏蓋凶歲民易流亡故殺禮而昏俾
之有燕爾之戀無愬去之心然後可安土而徐議其補
救故曰聚也後世此策不講一遇凶歉有嫁娶無力而
訐訟不休者有逃亡無著而怨曠失時者皆足以干天
和而召水旱也

定新籍則以樂昏擾眈安土著則以多昏聚民先王之
道不外於順人情而已

保息

保息六事以安富終蓋富者貧民之所待命也富者安而上五事可以次第舉矣後世強幹吏好以扶弱抑強爲事者其未知周禮安富之意耳

本俗

安萬民先以媾宮室王者欲使斯民爲子孫長久計俾之安土而重遷也故荒政之多昏繫之於凶歲本俗之媾宮室繫之於平時此政不舉而游民輕去其鄉賃廡而炊倚檐而息不以爲苦而轉以爲恆業前明鄖襄之

棚民因以作亂始知先王之爲斯民慮者遠矣

鄉八刑

成周鄉刑當時必有科條自鄉大夫至比長次第掌之不屬有司蓋防患於微禁邪於漸使莠民不敢以有司耳目所不及而肆成其惡實與鄉舉里選相輔而行自鄉刑廢而獄訟繁興桁楊滿路有司日不暇給而小民無路自新是罔民也豈不大可痛哉

鼓人

鼓人軍動則鼓其眾注動且行也愚案且行二字古人

訓故之例也動者行之始而不可徑以行訓動故且之
詩中谷有雉毛傳云脩且乾也說文莫字下注云日且
暝也同此故義呂覽音律篇高誘注且將也振亂篇愛
士篇皆有是注詩簡兮箋將且也谷風箋將且也東山
箋今且至矣大叔于田箋田事且畢齊雞鳴箋東方且
明之時此皆鄭義也今讀注疏者不攷而疑爲誤坊本
徑改爲旦行是不知古義也

載師

榛林之征二十有五先王非以苛斂以抑末也此法廢

後世遂有以良田沃土棄嘉穀而植他物者一夫獲利百夫效尤雖有明禁不能呵止如近日蘭州之水煙卽其一端而先王裁成輔相之術至是窮矣

司市

國凶荒札喪則市無征而作布注金銅無凶年賈疏金銅凶年亦賤是以諺云豐年粟儉年玉案世說之語得此疏而明

稍人

古甸乘同音

如田之與陳

以六十四井出一乘因制爲甸名

後遂以音同而轉相假借周禮稍人邱乘卽邱甸也左傳哀甸卽衷乘也

廿人

廿人注物色占其形色知鹹淡也賈疏鄭以當時有人採者嘗知其鹹淡卽知有金玉故以時事言之也愚案嘗鹹淡知金玉之法僅見此注

小宗伯四望

四望先鄭二說後鄭三說紛紜莫定當以後鄭五嶽四鎮四瀆之義爲長

司尊彝

舟所以載彝彝常也典常之則不可過故取象於舟楫
有沈溺之義焉彝所以酌尊尊宗也君宗之膏不可屯
故取象於雲雷有施行之義屬

大司樂

以六德爲之本以六律爲之音二句六詩之義囊括無
餘千古說詩之書浩如煙海總不外此

占夢

周禮稱王拜受者四民數穀數賢能之書而獻百夢亦

其一焉此聖人盡性至命之學所以使後王默鏡其得失自謹其感召而不敢肆然於晏安寢息之間者爲至微也古人論學謂夜驗諸夢寐其有見於此歟

司巫

巫恆巫之有恆者此可以證南人之言愚案古人最重世業非特世祿世爵士之子恆爲士農之子恆爲農也凡五官及攷工記所載百工之官以氏名者皆取諸世業之選馮相保章天文之職亦必以疇人子弟爲之醫不三世不服其藥紀於曲禮蓋有恆業者必有恆產有

恆產者斯有恆心所以範小民之耳目心思而不致有放蕩奇袤之行著此也後世惟泰西之人能守此義故天文曆法技藝器用迴絕人寰惜其不知先王之道無中國禮義之訓而惟奇巧是營此所以終囿於夷也

大司馬

大司馬險野人爲主易野車爲主人卽徒兵也困學紀聞謂春秋時晉鄭有徒兵蓋始用之平地

司燿

司燿注燿火謂熱火疏對司烜氏以夫燧取火于日中

爲明者爲冷火明火之爲冷火未詳其義

挈壺氏

挈壺氏賤職也乃以不舉其職見刺於詩者二風則東方未明雅則夜如何其蓋所係於君德者大矣

職方氏

兗州其浸廬維維卽禹貢青州之濰漢書地理志濰或作淮顧亭林山東攷古錄云古人省文濰字或作維或作淮者從水從鳥佳之佳卽維字而省其系耳今呼爲淮竟爲江淮之淮從水從佳人之佳於隸則差之毫釐

於古文則失之千里矣愚案從佳之淮今隸所未見字
書亦皆未載然亭林大儒博學言不妄發當必有本

山師川師

山師小師致其珍異之物蓋如磬錯橘柚大龜之類非
他珍異也

大司寇

大司寇三日乃致于朝然後聽之此後世三八日放告
所由昉小司寇至于旬乃弊之此後世招解案以一月
爲限所由昉一則不輕受民之訟使悔過者知止一則

不輕加民以刑使受法者不冤後之治獄者無哀矜惻
怛之念無忠信明決之才而徒以速爲能民之不冤者
鮮矣

小司寇

禹謨云刑期于無刑民協于中呂刑一書言中者十大
司徒十二教七曰以刑教中小司寇歲終登中于天府
至司刺掌宥赦亦曰求民情斷民中非特不忍偏於嚴
且不敢偏於寬故中之一字千古用刑之準也

司約司盟